

度

支

奏

議

度支奏議目錄

貴州司二卷

覆議崇文門加增條稅疏

覆薊撫請發中協額支撫賞疏

覆崇文門官商納稅則例疏

覆查該科臣題報關稅缺額疏

覆中協監視請發未領撫賞疏

議罰關稅缺額司官疏

查奏中協未領撫賞銀兩疏

題議帶徵積逋條稅銀兩疏

題明李縉徵權稅小盡缺額緣繇疏

覆崇文門主事王胤懋罰治疏

覆議川貴總督清理新舊田賦疏

再題公用銀兩始末請早覆結疏

度支奏議卷之二

太子太保戶部尚書溫甫自嚴視草

覆議崇文門加增條稅疏

題爲清條稅以杜侵隱時徵解以實

國用敬陳四議仰祈

聖鑒事貴州清吏司案呈崇禎四年九月十九日奉
本部送戶科抄出提督寶和等店司禮監掌印
太監王永祚題前事等因九月十五日奉

聖旨這條稅銀兩按季見解前欠帶徵查對文簿明

開則例等項俱依議行其加增四毫既入條銀又
復解庫是何緣繇着查明具奏戶部知道欽此欽
遵抄出到部送司案呈到部該臣等看得崇文
門每年四季解寶和店條稅今據提督內臣王
永祚條議四款一曰條稅見徵見解夫商賈按
貨報抽據例納稅納完放行隨徵隨解原係明
白直截今議從本年秋季起按季解店奉有

俞旨自宜欽遵至於每季帶徵一月此該店欲清理
舊欠之良法惟是拖欠接解之因業經該店查

明入疏今新收者已解見季舊欠者責令截補
共計壓欠六個月恐爲數不貲一時未必能取
盈雖臣部劄行該門設法遵解但有帶解無帶
徵未免賠苦就中或令兩季補解一月陸續通
完是則

皇上浩蕩之洪恩也一日稽考以脩查對夫稅名有
正條之分總之皆從商稅中分析名雖異而實
則同脩造簿籍以供稽考所以防隱漏也無奈
法久懈弛年來遂成故事造冊旣不如法送查

又復愆期臣部業經催償督造務循舊規每季終將課稅同稽考簿呈解再有不行按季造報者監督官以溺職論一曰則例以憑磨筭夫徵收原有規則成例具存臣部已經創行崇文門取有刊板印冊其通灣行空運場造有文冊轉送該店以便磨筭自當瞭然於心目之間矣一曰四毫按徵起解此款奉有

明旨着臣部查明既入條銀又復解庫緣繇臣部謹遵

旨查明脩陳於

皇上之前查崇禎元年以前每條鈔一貫原以三釐
二毫七絲徵收崇禎二年五月內臣部會議已
經

宸斷一疏奉

旨各關加稅克餉崇文門以原額九萬兩計之正稅
條稅二項共該加銀四千五百兩是以每條鈔
一貫加銀四毫以足此四千五百之數也查該
門除江米舡銀豬牛羊魚菓例不槩加外其每

年條鈔所加四毫之銀徹底總筭不過二千餘兩扣解太倉以濟軍興此四毫既入條銀又復解庫之始末也今內臣議以四年秋季爲始按見徵之三釐六毫七絲起解是條銀每貫較前增解四毫而太倉覓餉之四千五百兩每年又當減去二千餘兩矣蓋總是

皇上之金錢在

內在外總裕

國儲亦何害分別於其間也恭

命下臣部卽劄令該門監督逐一遵奉施行

崇禎四年十月二十日具

題本月二十三日奉

聖旨知道了帶徵着遵前旨行加增條稅着一併解
進欽此

覆薊撫請發中協額支撫賞疏

題爲乞賜中協額支之銀以應急切軍需之用事
貴州清吏司案呈崇禎四年十二月十五日奉
本部送戶科抄出整飭薊州等處邊備兼巡撫
順天等府地方都察院右僉都御史傅宗龍題
前事內稱中協經虜之後臺牆大小銃砲及火
藥火箭十僅存其二三以羊補牢正在今日且
練兵待戰則綿鐵盔甲與夫長短兵仗無一不
需之局中前撫臣劉可訓所交代於臣者軍器

銀一千五百餘兩前督臣張鳳翼分發於臣者
軍需銀八千兩八箇月之內五局並作除前三
項銀支完外尚借支過賞功等項銀一千五百
餘兩而欠各鐵商之銃價薊州道與遵化道請
補給者尚該二千九百餘兩今臣所練馬兵三
千鐵盔甲未滿千副臣正責成各委星夜併工
不容停爐姑待臣讀邸報近以遼鎮甲價九千
金索之問寺執爭往復屢贖

宸嚴臣何敢復向兵工諸臣強求以所難應查得三

年分中協未領戶部屢增新賞銀二千九十二兩零四年分未領戶部撫賞并新增銀五千三百七十一兩零兵部撫賞銀二萬二千四百兩此俱額徵額解之數臣前具疏以充馬價已奉旨下部矣未經咨發臣日延頸望之今軍器所需視馬價更急伏乞

勅下兩部如數解發前來半充馬價半充軍需以昔日羈縻屬夷者仍還爲今日馭夷之用不必另爲措處亦不必別煩執爭計無有便于此者等

因崇禎四年十二月十四日奉

聖旨戶兵二部酌議速奏欽此欽遵抄出到部送司
奉此查得薊鎮中協三年分原設新增撫賞銀
二千九十二兩零應于二年題發本部因承額
等衛夷人多爲挿齒吞併其中未必無可減省
故未經題發其三年應題發四年分舊賞并新
增銀共該五千三百七十一兩零因東西酋奴
釀禍亦經停止卽三年已領之舊賞奉
旨行督撫清查尚未回

奏屢經咨催今撫臣議移額設之銀爲軍器之用
查無舊例相應具覆案呈到部該臣等看得錢
糧各有款項職掌各有司存撫賞旣停庚呼仍
急外解多逋餉支正匱臣部方自顧不暇寧能
問之局外乎薊撫綢繆桑土設立多局其匠役
餉銀已取給臣部矣至於馬價軍器事隸兵工
二部似於臣部無涉若照原議曲徇倘各鎮援
例而請臣部安能逐一額外應之又此後更需
撫賞各鎮誰能代臣部補給者乎非敢誼緩同

舟實係憂深仰屋該撫所需銀兩應聽兵工部另爲酌議者也

崇禎四年十二月二十三日具

題本月二十六日奉

聖旨這中協未領撫賞銀兩是否係應減停止之數還着監視會同該撫按查明具奏欽此

題崇文門官商納稅則例疏

題爲敬陳官商稅則例仰請

聖明申飭以裕

國課事貴州清吏司案呈奉本部送該監督崇文門商稅戶部浙江清吏司主事王胤慈呈前事內稱竊照本門額稅年計九萬四千五百兩內以花布紬段居其半落地牛羊猪口魚菜居其一襍貨居其二一切官貨居其二近見四境撓襍孽寇叢生商賈不前貨物輟市十無五六本

職深慮缺額計無所施查得官商原有分別有
召商有僉商僉商者乃本京土著人戶先交物
料後領官價委有賠累之苦召商者乃四方流
寓於京先領官銀經年積月方納貨物大獲母
子之利且免稅亦有應與不應如外解土產本
色乃州縣僉派解戶亦有賠累之苦例應免其
徵輸若省直輕齎銀兩赴京收買上納及戶工
兩部召商買辦物料彼既獵有厚利無容免其
輕稅故往往報納成案昭然卷查天啓五年間

大工肇興該前任監督員外李志道將舖商陳文漢等承辦顏料絲麻銅鐵硃漆等物照例押單共銀四千六百六兩零緣繇呈堂具題奉

聖旨正稅係稅係濟邊上用急需着照舊例徵收不許容各商虧欠悞事欽此隨該工部復題奉

聖旨九係殿工亟需物料着戶部照例免稅各欽遵在案今

大工告成已久官貨似當照舊納稅若仍被諸商藉前旨爲辭不問其徵課則本門額稅何繇而足合無

呈乞題明凡有頂門過務及在京收買除硝黃
銅鐵係軍需之物目今邊事擾攘暫免納稅止
查夾帶俟澄平之日又當照例徵輸亦必先有
割付坐定數目方許優免否則係私貨其銅斤
絲麻花布顏料硃漆等項悉照舊起稅無容混
指脫漏徒飽奸腹以虧

國課等因到部送司案呈到部臣等看得崇文門
權稅一役課額日增於昔貨物日減於昔監督
司官每每以足額爲難攢眉作苦良以東西交

江商旅跡兼之官貨影射遂使

國課頓虧有繇然耳稽查舊例如同一官貨也外
解者原解本色貨物則免原解銀兩而抵京收
買者是謂輕齎則徵在內辦者爲僉報商人則
免爲召買商人則徵此往年之定例也自
三殿工興槩行暫免今

大工之告成已久而召商之垂涎未已坐是

國課

內供俱受其誑以後官商貨物似當查照外解之

例分別徵收茲議除硝黃銅鐵係軍興急需仍
宜免徵外其餘銅鉛布帛等物孰非民間之所
取用借曰納官則外解獨非納官乎借曰可免
則輕齋獨不可免乎况所徵正稅條稅非係
上供卽係軍需安在其獨緩者且彼領

國家之銀錢博自己之利息原與商販無異徵之
原無損於商免之則有虧於

國今據該門監督呈乞納稅則例前來相應題

請恭候

命下查照前例分別開徵庶奸商不得影射而
國課不致虧損矣

崇禎五年正月初九日具

題本月十二日奉

聖旨依議欽此

覆查核科臣題報關稅缺額疏

題爲年終

奏報鹽課關稅原額完欠并泉局銅本已未完數
目事貴州清吏司案呈崇禎五年正月初三日
奉本部送戶科抄出專管查覈餉務吏科右給
事中許世孟題前事內稱崇文門管差主事劉
鎬河西務管差主事劉孔敬皆值虜警缺額已
經題

允考覈矣淮安鈔關主事李春英少解二十七兩數

尚無幾九江鈔關主事洪周祿少解銀三千三百四十一兩一錢一分四釐查該部考覈疏開該關秋冬苦於楚荒禁糴春夏又爲漕運募船鹽艤阻塞查其額外亦解助餉銀四千兩又查臨清鈔關主事康姬昇少解銀一萬三千三百一十四兩五錢五分一釐查該部考覈疏開該關虜警之後商賈稀少民船絕於糧艘陸路梗於運妖又值築壩柳林蓄水濟漕於是缺額難補俱經該部具題考覈在案等因崇禎四年十

二月三十日奉

聖旨鹽課欠數及借過銅本着嚴催解還悞交的該
庫撥補向來管權各官該部無不優獎復職如何
稅額尚缺好生朦胸通着詳查數目職名覈議奏
奪王文耀等已有旨了該衙門知道欽此欽遵抄
出到部送司查得崇文門主事劉鎬自崇禎二
年十一月十七日接管僅三日虜薄城下商賈
絕跡本部兩次題明以商貨通行日爲本官接
管定額之始三年十月中本官恐亂差規不顧

展期足額自行疏

請截差本部覆奉

明旨更替考核復職欽遵在案河西務主事劉孔敬
自崇禎二年八月二十一日接管至十一月內
值虜犯內地商賈裹足不前稅額有虧亦經題
明在案淮安鈔關主事李春英僅欠正額二十
七兩而額外捐助近二千兩已另疏具題矣查
臨清鈔關舊額八萬二千八百兩自遼左失後
東北數鎮邊商絕少屢因徵解不前議減二萬

兩該解銀六萬三千八百兩崇禎元三兩年後
依各關例兩次加增九千五百七十兩通共新
舊額課七萬六千五百六十兩管關主事康姬
鼎自崇禎三年六月十二日起至四年六月十
一日止共解過

內庫錢鈔太倉及買銅襍項等銀六萬三千二百
四十五兩四錢零外少解額稅銀一萬三千三
百一十四兩零又在差續解設處關役助餉銀
三千七百五十兩通前解共六萬六千九百九

十五兩四錢零實少額銀九千五百六十四兩
六錢備查該關缺額之繇先因東省災荒繼因
遼商斷截管差十數年來多不過四五萬兩並
未有能及額者所以元五兩年各關皆議加增
而臨清關獨議減額則凋瘵可知矣且康主事
值虜警之後民船絕於糧艘復經柳林築壩貨
舶難通而康主事釐剔急公其起解數目較之
增額雖少九千餘兩而較之從前差稅實多近
萬時地所窘原難與他關比例當日呈部考覈

時業已明白入

告矣及查九江鈔關原額二萬五千兩自天啓元年
後四次加增四萬九千七百五十兩通共七萬
四千七百五十兩內每兩加二羨銀一項該銀
一萬一千五百兩本官在差奉行兩個月零五
日應扣去銀九千四百六兩八錢實該銀六萬
五千三百四十三兩二錢管關主事洪周祿自
崇禎二年六月十六日起至三年六月十八日
止共解過內庫錢鈔太倉及買銅襍項等銀共

六萬二千零九十三兩二錢時因楚荒禁糴
運募船致苦缺額洪主事條陳闢政疏內曾經
奏明又額外汰捐助餉銀四千兩總計在差共
解銀六萬六千九十三兩二錢其額內所少三
千二百四十一兩一錢零雖如科臣所摘而合
額外捐解四千兩尚餘七百五十餘兩雖非額
稅之征實係該差所解且當日洪主事創行搜
解爲各鈔關之倡而是年各差聞風効助本部
共得額外餉銀一萬五千餘兩不可謂非本差

倡勸之功又案查天啓六年三月內本部題覆前任侍郎靳於中條議一款各鈔關以增額完欠分爲三等考覈如增額全完者照例優遷止完五分者照例紀錄全未完解者照例降調題奉

欽依在案故當日洪主事考覈題復得從紀錄之例其餘俱未嘗紀錄也等因案呈到部看得各關差之難足額其故有二一苦于軍興來增額之多一苦於遼陷後邊商之斷主事劉錫管崇奉

門差僅三日而虜薄城下屢次題明與劉
管河西務差皆在崇禎二年奴警之日門閉無
從得征商逃無從問貨近在

輦轂缺額之故耳目共覩久蒙

聖恩鑒照復職矣至於九江臨清亦自有說以九江

關言之本關原額二萬五千兩耳臣部苦餉無

措萬不得已屢請增額又加四萬九千七百餘

兩已過原額二倍矣而管差主事洪周祿又

荒楚閉糴漕運募船勢不能取足於商船乃

計汰釐于稅外疏解助餉銀四千兩臣部因循
覆以倡勸各關而各關是年遂共有萬餘金之
助解少補軍儲涓滴臣等照例題覆欽錄其一
以勸衆耳查天啓六年三月內臣部題覆侍郎
靳于中條議奉有

欽依分別考覈例以完及增額五分者概從紀錄固
已心慮增額之難及矣蓋臣部自天啓元年以
後關稅五次加增不過爲急公者立之程限寧
亦未敢取必也凡屬東南諸關皆苦增額之多

而九江其一也以臨清關言之原額稅銀八萬三千餘兩以遼瀋開鐵數鎮素稱饒沃邊商挾重販而往源源不絕皆經此關自遼左一失商販裹足近又督催漕運糧艘絡繹貨載淤阻而臨清始苦無征遂議減額二萬兩管差主事康姬昇當漕運盛行柳林築壩之日猶能征解搜助至六萬六千九百餘兩較之十數年來實爲僅見非輸將之敢後實貨販之不前是以臣職覈題復職未敢紀錄然查其所少者若連捐助

三千七百兩作數亦僅減額後比例新增之九千餘兩耳嚮非地實限之何以前此各關俱議增而臨清獨議減耶蓋凡屬東北樞關皆苦遼商之斷而臨清其一也至管淮安鈔關主事李春英額內少銀二十七兩而額外捐助近二千兩近方題覈奉

旨另疏具覆惟是臣部據當日考覈各關原題數目錄送科臣科臣據部報考覈疏原數摘以入告其額內原少如洪主事之少銀三千二百四十一

兩一錢一分四釐康主事之少銀一萬三千三百一十四兩五錢五分一釐李主事之少銀二十七兩一一開送臣部原不敢捏多以示徇也其額外報多如洪主事倡助四千康主事之較前多解近萬李主事之捐助近二千一一開送臣部亦不忍捏少以阻勸也科臣查實以入告固見科臣之詳慎臣部據實以報科足明臣部之原未敢朦徇矣伏乞

皇上軫念近年虜警控總商販裹足查諸權臣前考

駁時業荷

聖明寬政姑免深求容臣部嚴行申飭以後務足原額無容錙銖短少此則仰候

聖裁非臣部所敢必也

崇禎五年二月初五日具

題本月初九日奉

聖旨朝廷通商惠民原非較量關稅但該部既經酌定卽當飭屬遵行近來司權各官借名加額反虧國課急公安在該部奉旨查核如何飭詞曲庇還

度支奏議

卷一

着再行分別確議奏奪欽此

覆中協監視請發未領撫賞疏

題爲遵

旨回奏查明中協未領撫賞銀兩事貴州清更司案
呈崇禎五年二月初三日奉本部送戶科抄出
監視薊鎮中協太監王之心題前事等因崇禎
五年正月三十日奉

聖旨撫賞正核濶冒豈容旣停復發其買馬製器作
何措給該部還酌議具覆本上印色淺暗該衙門
知道欽此欽遵抄出到部送司案呈到部該臣等

看得勘撫計切補牢徵騎繕器未敢外請措給
欲借三四年分本協停賞心亦甚苦監視會議
欲以本協撫賞之銀仍充本協軍需之用通融
緩急計亦甚便臣部何敢過爲爭執但念日來
邊呼寇警艱窘倍前災省頻蠲外解易竭停賞
雖屬涓滴積少成多以備意外急需非得已也

煌煌

明旨撫賞豈容旣停復發深窺

聖慮之遠不待臣部瑣陳矣而又念撫臣之綱繆難

緩酌議作何措給臣愚以爲買馬製器應隸兵
工二部前疏已明竊意兵部除厠寺馬價外尚
有驛站節省可用工部除四司料價外尚有事
例銀兩及臣部所分之恩餉二十萬可用極知
二部今日之匱或不減於臣部但市駿鍛犀職
掌已定多方設處似不容辭目今關寧增兵登
州告變費餉愈多臣憂方大實未能越俎代庖
萬一額外有必不容已之募援行月以責臣部
臣部豈能求助于他部哉非執典衣不問典冠

自後同舟之義實慮足兵莫難足食慎防破例
之端如謂本協錢糧仍充本協器甲之需則各
鎮今日誰是器精馬良者恐未免藉以爲例也
伏乞

聖明裁斷施行

崇禎五年二月十四日具

題本月十五日奉

聖旨着會同兵工二部酌議速奏欽此

議罰開稅缺額司官廐

題爲年終

奏報鹽課開稅原額完欠并泉局銅本已未完數
目事貴州清吏司案呈崇禎五年二月初十日
奉本部送戶科抄出該本部題覆專管查核餉
務吏科右給事中許世蓋題前事等因崇禎五
年二月初九日奉

聖旨朝廷通商惠民原非較量開稅但該部既經酌
定卽當飭屬遵行近來司榷各官借名加額反虧

國課急公安在該部奉旨查核如何飾詞曲庇
着再行分別確議奏奪欽此欽遵抄出到部送司
案呈到部該臣等看得臣部前此請加關稅至
再至三不得已而至於五實迫軍興無措急計
權宜卽以此負怨謗於四方而有所不敢避者
惟是繇少之多頓增爲難此當日建議者所爲
復開破格獎勸之門以示歆動者也今司權諸
臣未能遵行屢增之

旨有負臣部臣等方自訟之不暇何敢再爲求寬

聖旨謂既經酌定卽當飭屬遵行臣等誠措躬無難
矣謹再遵

旨分別確議查得原管崇文門稅課主事劉鎬管差
未幾卽遭醜虜之薄城而城門盡扃原管河西
鈔關主事劉孔敬密邇近

畿亦值胡虜之蹂躪而商旅阻絕已經題

請明白奉有

俞旨自應免議南部原管淮安鈔關主事李春英筭
額稅實解內少銀二十七兩查係該關給解折

色銀人役水脚二十七兩零有申文可據在
部筭入稅額在臣部止據入解銀數故此不
然李春英外又搜助頂首銀一千六百兩南
京勤

主犒兵銀五百三十餘兩通筭有多無少故南部原
題溢額亦應免議惟有原管九江鈔關主事全
陞常州府知府洪周祿因值楚中旱荒商舡稀
少額內少解銀三千二百餘兩雖有額外助餉
銀四千兩除補還完尚多銀七百餘兩然於額

稅難辭多欠應議罰俸三箇月原管臨清鈔關
主事今告病回籍康姬鼎因值漕運築壩河道
爲梗雖差內解銀較之數年以來實多近萬而
核之兩番增額尚少九千應罰俸六箇月據二
臣所欠之數或虧舊課或欠新增卽重究似不
爲過原二臣所處之時一厄旱荒一艱漕運卽
薄罰亦足示懲查洪周祿已經陞常州府知府
應就見任內罰俸康姬鼎已經告病應候痊補
日罰俸伏候

聖裁至臣等飭屬無能理財滋匱何敢蹈曲庇之咎
終難解徇屬之愆惟有席藁待罪而已

崇禎五年三月初一日具

題本月二十五日奉

聖旨姑依議權額完欠正足驗司官才守豈專爲國
課贏縮卿等今後還當實心飭屬潔已勤公不必
空言引咎欽此

查奏中協未領撫賞銀兩疏

題爲遵

旨回奏查明中協未領撫賞銀兩事貴州清吏司案
呈崇禎五年二月十六日奉本部送戶科抄出
該本部題覆前事內稱先經順天巡撫傅宗龍
題爲乞賜中協額支之銀以應急切軍需之用
事欲將戶兵兩部三四年分中協未領撫賞銀
兩請爲買馬製器之用崇禎四年十二月十四
日奉

聖旨戶兵二部酌議速奏欽此續該臣部具覆崇禎四年十二月二十六日奉

聖旨這中協未領撫賞銀兩是否係應減停止之數還着監視會同該撫按查明具奏欽此續該監視薊鎮中協太監王之心題前事內稱三四兩年計戶兵兩部未經給發中協賞銀共二萬九千八百六十四兩一錢零內該戶部三年分未發賞銀二千九十二兩四錢又四年分未發賞銀五千三百七十一兩二項共銀七千四百六十

三兩四錢合之兵部四年未發賞銀二萬二千
四百兩共該二萬九千八百六十四兩零等因
崇禎五年正月三十日奉

聖旨撫賞正核濶冒豈容旣停復發其買馬製器作
何措給該部還酌議具覆本上印色淺暗該衙門
知道欽此該本部復查得買馬製器原隸兵工二
部前疏已明竊念兵部除厠寺馬價外尚有驛
站節省可用工部除四司料價外尚有事例銀
兩及臣部所分新餉二十萬可用市駿鍛犀職

掌已定多方設處似不容辭等因奉

聖旨着會同兵工二部酌議速奏欽此欽遵抄出到部送司遵

旨移咨兵工二部酌議去後今奉本部送准工部咨前事內稱薊鎮製器銀兩監視與該撫屢疏乞請欲動支撫賞者蓋深諒本部匱乏之極無可措處而爲此通融濟急之計也戶部謂本部有事例與分餉可用查事例戶部已分去一半本部每年止得十餘萬金合二十萬之分餉纔三十餘

萬耳若計所出卽盛安兩廠成造軍需及火藥等項并廣積庫硝黃價值每年已費至四十餘萬矣尚有不時意外緊急之費不與焉頂者

皇上軫念本部匱乏于今年正月初六日奉有爾部既稱匱乏各鎮軍器俱着該督撫官自行措辦不得頻請內給之

旨則薊鎮製器銀兩本部實無可措合遵前

旨行令自行措辦可也又奉本部送准兵部咨三月初一日該兵部尚書熊明遇等題同前事內稱

卷查去年十二月內該撫臣傳宗龍題爲乞賜
中協額支之銀等事內請將本協三四兩年分
未領撫賞銀兩如數解發臣查撫賞銀兩原爲
撫夷支用夷賞旣革似難別那等因業於本年
正月十八日題奉

聖旨撫賞旣革豈容濶發其三年分餘剩銀兩曾否
買馬若干還着該撫會同監視查明具奏欽此欽
遵隨行該撫及監視遵奉併查三年分已發存
剩銀一萬五千四百三十四兩八錢零勒限該

監視巡撫查奏去訖則是前項撫賞之弗敢那
發也已無容再計而決矣今監視復爲之合詞
上

請以本協額支之銀充本協軍需之用其爲徵騎繕
器計者已備極苦心矣計臣疏恐各鎮援例必
祈措應干兵工二部臣豈敢膠執固爭獨是已
解存剩之一萬五千四百三十四兩八錢零先
經奉

旨市駿固已有呼卽應矣而迄今尚未繳報豈容混

發

明旨煌煌再以撫賞議應非臣部所敢也卽籌之該
鎮年例馬價近又預發至七年分矣問寺正苦
捉衿似難責之更發搜節酌處以補不足是在
監視巡撫諸臣應自有幹濟急公耳至器械隸
之工部固無容越俎以籌也等因三月初五日
奉

聖旨據稱中協年例馬價該部預發至七年併以前
存剩銀兩有無買馬若干如何竟不繳報惟冀呼

額還着該撫同監視遵旨查明具奏欽此三月初五日該兵科外抄順天巡撫傅宗龍該中協監視王之心會題爲乞賜中協額支之銀以應急切軍需之用事

奏繳崇禎三年存剩銀兩仍請三四兩年撫賞銀因奉

聖旨該部覆核具奏欽此欽遵抄出到部送司案呈到部該臣等看得買馬製器分隸兵工二部而臣部不與焉臣部專司措餉而已前據兵部覆

度支奏議



疏撫賞已發至三年其存剩銀一萬五千四百三十四兩零已給該鎮買馬又領發過年例買馬銀至七年則兵部之所給發者已多矣又據工部回咨稱盛安二廠軍需及製火藥等項歲費至四十餘萬別無可措是工部又不能於額外措給矣至於臣部雖有三年分未發撫賞銀二千九十二兩四錢爲數無幾但夷賞旣革自令停罷且前此宣雲正以混支嚴核豈在中協而臣部尚敢冒昧給發也今四壘多事一切行

月援剿諸費鱗次蠅集區區涓滴扣賞尚未足
補其萬一安能越俎以代兵工買馬製器者乎
在兵部既奉有豈容混發及惟勤呼籲之

旨工部又援有各鎮軍器俱着該督撫官自行措辦
不得頻請內給之

旨臣部前奉有撫賞豈容既停復發之

旨臣等卽欲委曲酌濟而勢實處于兩窮非敢內外
異視而自後于同舟之誼也蓋通計中協撫賞
則臣部應出者原不敷五分之一今四年撫賞

在兵部之多者已不發矣而臣部之少者可獨
發乎乃若三年所欠纔止二千有餘如以爲撫
賞已停則截留不發者經也如以爲封疆急需
則照數裁發者權也是在

聖明俯賜宸斷臣部謹奉以從事耳此外非臣之所
能知矣

崇禎五年五月初一日具

題本月初四日奉

聖旨着遵前旨行欽此

題議帶徵積逋條稅銀兩疏

題爲舊逋難追

新命當請仰祈具題以安職業以蘇貧役事貴州清
吏司案呈奉本部送據監督崇文門商稅戶部
浙江清吏司主事王胤懋呈前事內稱竊照本
職受事以來潔已奉公爲

國爲商以副

朝廷之任使然有不獲已之事不得不據實陳懇以
蘇困苦如帶徵舊欠條銀前該寶和等店具題

內稱條稅以崇禎四年秋季爲始責令該關
徵其四年春夏一季條銀每季帶徵一月務在
漸次通完等因奉

聖旨這條稅銀兩按季見解前欠帶徵查對文簿明
開則例等項俱依議行其加增四釐既入條銀又
復解庫是何緣繇著查明具奏戶部知道欽此隨
蒙本部議覆條稅舊欠者責令截補創行該關
設法遵解但有帶解無解徵未免賠苦就中或
令兩季補解一月陸續通完是則

呈上浩蕩之洪恩等因奉

聖旨知道了帶徵着遵前旨行加增條稅着一併解
進欽此備行本門欽遵在案爲查春夏二季實非
見季之拖欠乃數十年積逋歷至於此但歲久
人移滄桑不知幾更而久年之積欠何能追呼
及前然職亦不以勞怨爲辭嚴令見役經紀各
於時下所過貨物量捐牙用帶納雖則如此卽
盡捐一年之牙用焉能取償原定之數哉况經
紀均係窮役藉此糊口近見若是之迫皆相率

而避之矣職展轉思維無計可施惟請

寬旨抑可少存二三之貧役以了數十年之宿逋且

條銀舊欠六個月共該一萬四千五百八十三

兩一錢二分六釐三毫九絲前任包主事止帶

徵一個半月已解過銀三千一百六十五兩八

錢九分八釐一毫五絲至六年管差者又止該

帶徵半個月止該解銀八百三十四兩一分三

釐五毫七絲惟職任內帶徵四個月共該解銀

一萬五百八十三兩二錢一分四釐六毫七絲

蓋少則易於結局多則必難措處除職已解過
銀四千一百九十一兩五錢二釐尚未解銀六
千三百九十一兩七錢一分二釐六毫七絲仰
懇代爲題

請乞將未解銀兩責於六七兩年管差者均爲帶徵
每官各帶解一個半月或如原題兩季補解一
月如此不獨任事者易於竣職且緩一時而貧
役得受一時之賜其與該店漸次補完之議亦
不相刺謬矣今兵戈四起商旅潛踪所過之

較昔十無五六乃九萬四千五百兩之額銀將
來作何湊足是以憂心如惄不得不再爲陳懇
伏乞具題等因到部送司查得崇文門稅額內
有條銀一項應解寶和店者因節年積逋壓欠
至六個月有一萬四千餘兩崇禎四年十月內
該提督寶和店太監王永祚具題每季帶徵一
月解店是期以六季補完前述也自四年秋季
爲始前管崇文門差包主事帶解一個月半完
過三千一百餘兩見任王主事接差帶徵又前

解過四千一百九十餘兩尚欠銀六千三百九十餘兩據王主事稱積欠無商可徵止扣追二三牙行賠解除自去年秋季帶追至今所完七千餘兩已刮盡貧役之骨後此所欠六千三百九十餘兩萬不能于半載內取盈卽部覆原疏亦稱有帶解無帶徵曾請以兩季補解一月已逆知積欠勢難驟補矣與其苦之于一年之內而追解術窮曷若通之爲兩年之徵而陸續易奏或亦可額請于

聖主之前也合候部裁案呈到部該臣等看得崇文
門主事王胤懋差內稅額九萬四千五百兩爲
數已多又欲帶解條銀一萬五百有奇之積逋
適當叛寇震鄰之日遭此商旗卻步之時全徵
舊欠時勢實難言之遼年商稅旣無可徵見在
牙行尤苦赤貧此臣部前疏有兩季帶徵一月
之請也窮蹙議通除前主事包鳳起任內已補
解過銀三千一百六十五兩八錢零仍該未解
銀一萬一千四百一十七兩二錢零今主事王

胤懋任內若令補解四個月便該銀一萬五百
八十三兩二錢零外所欠止八百三十餘兩耳
今據王胤懋呈稱積逋難追設處不易未免虧
損正額令無將未解銀一萬一千四百一十七
兩二錢零均勻派於五六兩年差內每差應補
解銀五千七百餘兩視之兩季帶解一月之額
更浮之矣庶正稅得免缺額而貧役亦獲少蘇
此

浩蕩之恩出自

聖裁非臣等所敢必也恭候

命下剗行該門遵守施行

崇禎五年六月十七日具

題本月二十一日奉

聖旨這積逋條稅銀兩着遵前旨每季帶徵一個月

務在如期通完不得延誤欽此

題明李縉徵權稅小盡缺額緣繇疏

題爲府官推陞在前被叅在後謹剖明月日以候
聖裁事貴州清吏司案呈奉本部送戶科抄出吏科
外抄吏部文選清吏司署員外郎事主事牟道
行等奏前事稱崇禎五年八月二十八日該臣
司爲缺官事河南彰德府缺知府奉有速推
明旨查得戶部咨稱員外李縉徵差滿考核奉
旨復職且本官俸已及期卽將本官擬陞彰德知府

題奉

聖旨是欽遵在案至本月初四日抄出總理戶工兩部太監張彝憲題爲權賦缺額甚多謹據實直
奏仰祈

嚴飭以裕

國課事內開李縉徵任內缺解銀一千五百三十
八兩在臣司中只據戶部考核復職之咨則推
只查三年有餘之俸則推推陞在前題叅在後
統惟

聖明裁奪施行等因奉

聖旨知道了李縉徵既係權額缺解戶部何以考核
復職移咨陞轉着作速查明奏奪欽此抄出到
部送司案查八月二十八日該戶科抄出總理
戶工兩部錢糧司禮監太監張彝憲題前事奉
聖旨各關權稅胡之竝等尚多透解劉漢等何獨缺
額甚至缺有數千萬的尤可詫異前時該部考
核曾否奏明且正稅尚多缺額何故又有餘銀
解部濫克公費又各關解數與單簿收數是否
別無隱漏再加覆核侵否立見着該部堂上官

逐一計查擬實奏奪不得隱徇巡視科道前有
旨會同查核何未見具奏該衙門知道欽此內
開許墅鈔關主事李縉徵任內缺解額銀一千
五百三十八兩方候呈堂查覆間復奉抄送吏
部前因案查本年七月二十四日該本部題爲
考核司屬事據管理許墅鈔關主事李縉徵呈
稱於崇禎四年三月初十日接管起連閩及小
盡扣至崇禎五年二月十五日止一年任滿遵
奉部劄共收過本關正料并湖口補料本折色

共一十一萬三千七百五十兩實數後因見接管官員未經到關又自本月十六日任外續收起至十九日交代止共收過銀一千二百六十四兩五分通計前後共銀一十一萬五千一十四兩五分具呈到部送司查得本關原額新舊共銀該一十一萬三千七百五十兩正事李縉徵任內連閏及小盡一年差滿實解過太倉庫銀九百六十一兩三錢三分五釐四毫

內庫錢鈔舖墊等銀一萬七千四百八十六兩六

六錢三分五釐五毫二絲應解太倉改給

內府丁字庫商人王允誠採辦物料銀一萬兩例
給

上用草蓆價銀三百三十五兩四錢七分五釐應解
舊餉改還新餉銀一千五百八十六兩二錢三
分七釐九毫二絲廊櫃扣省銀三千三百八十
兩三錢一分六釐一毫六絲新餉庫銀四萬兩
解南京蕪湖買銅銀四萬兩共完解過一十一
萬三千七百五十兩其任外四日又解太倉庫

銀三百六十五兩六錢八分七釐一毫四絲

內庫錢鈔鋪墊等銀一百九十四兩二錢五分二釐三毫六絲新餉庫銀六百六十六兩五錢六分廊櫃扣省銀三十七兩五錢五分五毫四項共解過一千二百六十四兩五分新舊額餉俱解完足業經本部會同總理查核具題於七月二十七日奉

聖旨是准復職欽此本部循例移咨吏部知會復職其陞轉事在吏部本部咨文原未及也至總理

後叅缺額緣繇案查該關舊例原係計日攤課
遇有小盡日期卽挨日扣補本官管一年零十
日而止解一年零四日其未解六日原是補足
該年小盡之數總理磨筭時或但以一年通算
未經扣除故見爲缺解耳小盡之日無收安得
有解連閏及扣除小盡考核呈詞甚明照例扣
除原非缺額等因案呈到部該臣等看得考核
司屬奉

旨復職者例應移咨吏部而陞轉遲速吏部自有俸

序員外李縉徵司權足額蒙

恩復職臣部循例移咨吏部復職非咨陸轉也選司
查俸擬陸論俸期非論咨文也選司疏稱據戶
部考核復職之咨查三年有餘之俸則臣部咨
文之無陸轉字樣與縉徵之以俸序得陸亦已
昭然矣惟是一李縉徵也臣於五月中具稿移
會總理考覈該總理再四詳慎吊取縉徵文簿
細加磨勘凡兩閱月而後盡題過部會題奉
旨復職矣未一月間復有一千五百三十餘兩之叅

臣反覆思之不得其故因將緡徵任內文簿及
該關舊例逐一再查面相詰問始知總理之緡
叅缺額自有因而本官之被叅缺額實可原也
查許聖關原額止四萬五千兩天啓元以後
五次加至十一萬三千七百五十兩計差以十
二個月爲期計日以三百六十日爲實月小一
日則展一日以補之此該關成例也本官於崇
禎四年三月初十日接管起連閏及小盡扣至
崇禎五年二月十五日止任外又自本月十六

日起至十九日止以年論似一年零十日本官
於正額之外止另解任外四日內之數則六月
似屬缺解若有一千五百三十餘兩之缺數矣
總理查核到此可謂極其縝密然而天行無實
在三百六十日之歲那後補前本官以該年三
百五十四日流算扣補當得六日而此六日者
實屬一年小盡之數未可另爲吹求者也此非
臣之曲爲寬解也扣補小盡不止許墅一關亦
不始自緡徵一人緡徵呈稱連閏及小盡扣成

差滿夫小盡積而成閏若論年不論日則閏月亦當作一年數矣臣部既不敢以十三個月滿算司屬一年之差自不得不以三百六十日實攤司屬一年之課月日分數配合相當明白易見者臣部於考核疏中已經聲明連閏及扣除小盡在案但總理有疑於裏不得不舉以入告而本官遵例扣除實非缺解業經

欽依准其復職已經吏部敘俸推陞應否准其赴任

伏候

聖明裁奪臣等因此而再有說焉恭繹

明旨云缺有數千萬的尤可詫異前時該部考核曾
否奏明臣部因措餉維艱自元年以後各鈔關
五次增加任怨不辭其解多溢額者仰請紀錄
而間有不及額者亦必開列緣繇以俟

聖裁未有無故而混作及額復職者卽如總理疏列
近二十人按年計額按冊比額似亦不差但其
間有扣除小盡如李縉徵類者有因水旱缺額
以助餉多解相準曾經罰治如洪周祿類者有

先未加額而後始加額未便以全額通筭如戚
仲類者又有差僅數日虞薄城下缺額三萬餘
兩屢次題明節奉

俞旨如劉鎬類者總理疏云務求缺額之故蓋亦慮
及遠年缺額情形有在冊簿之外者而爲此虛
心商酌之語也幸蒙

皇上弘仁睿照復

命臣部會同再查單簿此固諸臣本末彰明之日也
臣等敢不刻意磨勘矢心虛公以仰副

皇上清釐申飭之至意謹遵

旨將李縉徵復職移咨緣繇先行查覆而并陳大業
如此惟

聖明裁察焉

崇禎五年九月二十一日具

題十月初一日奉

聖旨李縉徵權稅缺額既稱小盡扣補原係成例何
張燹憲磨勘未行銷筭又廊櫃扣省一項前該部
疏稱用充公費向未經巡視衙門掛號如何筭入

正額還着據實奏明其餘各官通着遵旨嚴加查核不得庇徇預爲寬飾欽此

據實奏明扣省銀兩始末疏

題爲遵

旨據實奏明扣省銀兩始末事貴州清吏司案呈崇
禎五年十月初三日奉本部送戶科抄出該本
部題爲府官推陞在前被叅在後謹剖明月日
以候

聖裁事十月初一日奉

聖旨李縉徵榷稅缺額旣稱小盡扣補原係成例何
張璣憲磨勘未行銷筭又廊櫃扣省一項前該部

疏稱用充公費向未經巡視衙門掛號如何等入
正額還着據實奏明其餘各官通着遵旨嚴加查
核不得庇徇預爲寬卸欽此欽遵抄出到部送司
除各鈔關關稅見在會同總理巡視嚴加查核
另行具奏外所有前項扣省始末擬合先行題
覆案呈到部該臣等查得臣部廊櫃所謂扣省
者扣於鈔關商人辦納之浮價也

國初之制各鈔關原徵納本色鈔錠十分隨鈔錢
二分後因民間鈔缺節議于十分鈔內改折時

古錢八分實進本鈔二分在案通因賞鈔歲移
古錢漸少商人訴求解折適值兵餉告艱前此
議者遂將各關錢鈔額課半解折色入太倉助
邊半買本色入

內庫備賞太倉既解折色自無商價可扣惟進納
本色一半原係該關給銀本商鈔戶就地收買
運京各數千里不等水脚包索諸費及進納鋪
墊門攤使用故所給商價原多後因各關無鈔
可買又古錢止行北地關商遂赴京收買歲賞

錢鈔轉出爲入臣部以商人既省運京水脚遂因爭告扣其前價之浮故謂之扣省也嘉隆之季無可考矣卷查萬曆二十四年十二月間據通政司准送揚州等關解吏葛桐等狀稱萬曆新錢原給價止二兩時京價騰貴乞要補給等情貴州司查議除河西務新錢臨清關舊錢俱係船商鋪戶自納本色不議領外將淮安揚州濟寧北新九江等關議古代錢每千給價銀二兩六錢新錢每千給價銀二兩一錢七分堂允

創行各關至萬曆三十二年十一月內因新錢
稍賤改定價爲一兩七錢於原價二兩一錢七
分內扣出四錢七分萬曆三十六年五月內因
古錢價賤改定價爲一兩三錢於原價一兩六
錢內扣出三錢二項所扣之價俱另文解入廊
櫃積貯有餘濟邊至萬曆四十一年五月內因
密昌二鎮經制失計缺額數多臣部議將各關
古代錢新錢價內各再減一錢起解太倉轉發
密昌二鎮以補缺額舊錢止給一兩二錢新錢

止給一兩六錢俱經題行至今遵照在卷天啓
元年衆商又懇錢價騰湧部議于新錢價准復
一兩七錢舊錢價准復一兩三錢其原扣解密
昌仍舊天啓二年四月內各商又告新錢價貴
署部事右侍郎臧爾勸准於新錢價一兩七錢
外再找給一錢八分定爲一兩八錢八分於原
價二兩一錢七分內以一錢解太倉以一錢九
分解廊廡天啓六年五月間據臨清鈔關呈稱
舊錢近限以五樣字號遠往山陝河南北直收

買價銀不數求復原價貴州司議於一兩三錢外量加一錢爲一兩四錢卽于廊櫃扣省錢價內支給崇禎三年二月內各商又訴舊錢遠方收買搬運缺少盤費議再增舊錢價一錢通前共一兩五錢其新錢時價稍平於前價一兩八錢八分內仍扣出二錢以一錢找補舊錢商價以一錢解入廊櫃此歷來扣省盈縮之案也查自天啓六年以後至崇禎三年五月止于舊錢原價一兩六錢內扣省出二錢內以一錢解太

倉以一錢解廊櫃實給商一兩四錢于新錢原
價二兩一錢七分內扣出二錢九分內以一錢
解太倉以一錢九分解廊櫃實給商一兩八錢
八分自崇禎三年五月以後于舊錢原價內止
扣省一錢解太倉實給商一兩五錢而廊櫃遂
無舊錢扣解矣於新錢原價內扣省出四錢九
分內以三錢九分解廊櫃以一錢解太倉實給
商一兩六錢八分此歷來扣省則例之數也各
關解到扣省銀兩盈絀不一多寡不齊原無定

額大都惟許墅北新二關所解頗多每季約八百兩上下次則九江淮安二關每季約三百兩上下揚州關每季約解一百六十兩河西關每季止解三十兩惟臨清關原無扣省止崇禎四年曾解四十餘兩後亦停止蓋臨清河西二關比歲常不足額自宜先完正稅故扣省特少非直以商人自納本色之故也至崇文門每季起解公費四百四十餘兩又係昔年題定不在錢鈔之內此各關扣省相沿之額也此銀扣之商

人以省水脚解貯廊櫃原非扣於太倉折色銀
內故未經太倉科院掛號亦非扣於本色錢鈔
數內故亦未經十庫科院掛號此臣前疏未經
掛號之故也然價雖扣之商人而銀實出於關
稅或解助邊或充公費不謂之正額不可昔年
考核疏內或混稱錢鈔而不言減省此歲

功令森然銷筭務求清楚故臣直行開列以明勿
欺此又

明旨所云如何筭入正額之故所當據實奏明者也

似此則原管漕暨鈔關主事李縉徵差內扣省銀兩其應筭入正額明矣又前奉

明旨云正額尚多缺解何故又有餘銀濫充公費此正可因查扣省緣繇而悉其故者各商分解本折於太倉

內庫特天啓元年以前之舊課而扣省一項又從舊課中一半本色價內扣出之數至元年以後五次加額皆係增解羨銀并無所謂錢鈔自無價可省矣通計各關本折舊額每年該銀三十

一萬七百二十九兩通計天啓元年後五次加增新額每年該銀二十八萬六百三十一兩自崇禎元年以至四年共該收新額銀一百餘萬今自元年以後各關司權所缺解爲總理開叅十七萬有奇總筭特少十分之一多係最後一次所加每兩二錢羨銀以內之數其實各關解過稅銀溢於舊課者多矣缺解在新增數內卽考核間有寬假亦各有因非敢任虧正額也扣省在舊課數內且年來搜括助邊亦自不乏非

敢取盈公費也此又正額雖或有缺而扣省仍
充公費之故也至李縉徵小盡扣補一節該臣
等查看得總理張彝憲奉查核之

命直論稅而非論差其查李縉徵差滿尚虛六日應
有六日之課故攤筭一千五百餘兩爲缺解也
臣部循考核之規各就差以核課其會題李縉
徵例扣小盡應除六日之課止應補差外實零
四日銀一千二百六十餘兩爲及額也在總理
挨年接日而筭未及查該關小盡之例在臣部

例扣小盡而核無繇課本官六日之徵況成例
原不始于本官則虛課似應准與銷筭諒在
聖明自有鑒裁而非臣等所敢議也緣奉據實奏明
之

旨臣故簡查卷案始末披瀝回奏伏惟

聖慈裁鑒施行

崇禎五年十一月二十六日具

題十二月初二日奉

聖旨該部錢糧纖毫總屬公課豈有私積私用全不

奏繳漫無稽查之理這廊樞銀兩不經掛驗輒稱
與倉庫無干及考覈司屬又稱銀屬關稅應筭正
額此項錢糧躲閃莫稽甚至稅額寧虧此銀必解
顯係借名公費恣意侵肥積弊可恨着總理同巡
視科道將歷年解收支用款項數目詳查具奏李
縉徵仍候查明議奪這本舍糊游混好生朦飾該
司官姑且不究欽此

覆崇文門主事王胤懋罰治疏

題爲嚴究偷盜官銀以肅法紀事貴州清吏司案
呈崇禎五年十一月十六日奉本部送戶科抄
出刑科外抄總理戶工兩部一切出入錢糧事
務司禮監太監張彝憲題前事內稱據監督崇
文門商稅戶部主事王胤懋呈稱爲照本門原
設銀匠一名日則啓閉積貯銀錢門戶及看驗
銀色搬移銀匣粘貼封條夜則巡風守隊公所
一舉一動悉屬斯役責任綦重是以職素戒嚴

凡收下稅銀逐日逐封親爲點發令其收貯乃
現役銀匠素繼先者于九月十三日突將銀箱
扯去封鎖盜銀四封計二百十八兩六錢四分
覺發研審則俛首無辭認贓押追然不卽叅處
者蓋以稅銀爲重急則投之水火緩則還之故
處欲效前人之故智令其以原銀償之也豈其
計延差竣希曷漏網而繼先何物么磨侵盜如
許金錢真爲目無三尺法應叅送依律究擬等
因到臣據此看得錢糧

國課一銖一鎰分毫爲重監守責成侵漁偷盜律
有明條孰敢翫法輕貫而不嚴究重處乎今據
呈該門徵收稅銀事干

國課向設有銀匠一名專管稅銀目今現役秦繼
先既經啓閉着驗搬移封巡此其關係不爲不
重奚得見財作奸猶敢扯壞封鎖盜銀二百一
十八兩六錢四分監守自盜之條勿容推卸雖
云認贓押追補完法所不宥仍當據實題叅從
重問擬以爲侵盜之戒庶法紀肅而

國課無虧矣該差主事王胤懋不行卽報已踰兩
月餘矣事屬遲慢合當量行罰治示儆相應具
題伏乞

聖明勅下該衙門將秦繼先嚴究重處施行等因崇
禎五年十一月十五日奉

聖旨秦繼先着刑部提問擬罪王胤懋久不奏報是
何情繇着該部查明議處具奏欽此欽遵抄出到
部送司案呈到部該臣等看得崇文門主事王
胤懋呈叅銀匠秦繼先扭櫃竊銀一節除該犯

監收自盜聽法司招結另覆外王胤懋職司課
務不能防禁巡守人役以致扭竊稅銀雖摘發
原自本官而叅報遲逾兩月如此疎忽罰處何
辭但本官于發覺該犯之後自追原銀欲待完
日方叅正罪恐一行題叅未免隨手花費耳不
意該犯初審已自俛認而比追復肆拖捱以致
呈報遂遲多日情繇寔係如此今查本官管權
門稅當增額後節約徵解之勞亦自難掩而差
竣偶有疎忽情尚可原及查總理原疏亦稱事

屬遲緩量行罰治蓋法如是止矣相應罰俸三箇月以示薄警者也恭候

命下臣部移咨吏部遵奉施行

崇禎五年十二月十四日具

題本月十八日奉

聖旨王胤懋着罰俸三箇月欽此

覆議川貴總督清理新舊田賦疏

題爲議清通省新舊田賦以佐軍需以垂永利事
貴州清吏司案呈崇禎五年三月二十四日奉
本部送戶科抄出貴州總督朱燮元題前事內
稱竊惟踐土食毛例有常貢則壤成賦

典制森然獨貴州一省全然闕略蓋緣

祖創造祇取官道一線南通雲南西通四川建立一
十八衛就中田土悉以贍軍及後漸次經略剪
除叛逆滅一土司打一國寨卽建立府治或設

州縣而土地所產不克經費自省會并一十八
衛官吏師生與夫站操各軍皆仰給於楚蜀協
濟總數雖有七萬兩頗多逋負此外民間絕無
所出一遇緩急惟有疾聲大呼仰冀

皇上發帑與分楚餉耳顧黔雖儉國境內山川亦自
廣衍地不盡皆石田而人不盡廢畚鍤也總繇
外夷內苗日弄干戈東支西吾絕無寧宇卽承
平時男子荷戈婦女栽插剽掠之警一日數報
受事者不及查亦不能查以致軍失伍而屯亦

頗減民有田而全不輸賦弊所繇來蓋非一日
臣自蒞黔與各監司晝夜籌量冀圖清楚今已
粗得其槩大約田有四項一曰賊田卽水外五
六百里內新開者也一曰絕田凡軍民被賊殺
盡或逃亡轉徙荒蕪無主者也一曰屯田卽洪
武以來相傳給軍屯種者也一曰科田卽士民
所私有者也賊絕二項應贍新兵屯田應查原
額清出欺隱照例徵輸粒食旣克干畝自備其
一切科田亦應覈底清查減額起徵凡此四項

皆地方本有之物爲軍民應出之輸大亂之後
秦蕪再開曩日豺狐業已屏跡若不設法與之
更始將來轉貸路窮何以支應夫地皆生財人
實戀土遲之數年生齒漸克墾闢漸廣兵可不
資於外招糧亦漸省於旁貸爲黔人計自是應
爾惟是履畝清覈事最瑣屑豪猾作姦千態萬
狀自非責成守巡糧儲道臣會同總兵官併副
叅等將加意清理力任勞怨未易就緒更乞

天語申飭以警惰玩庶法可通行而事得長久臣謹

條爲三款併有司之應紀錄應議處者仰請

聖鑒一日新屯南自三岔北至烏江五六百里內臣

行總兵官王國禎畢節道臣鄭朝棟安順府知

府楊先芳等經理清丈除開科洪邊十二馬頭

議改州治併施秉新復清出賊絕田畝另疏

奏報外其鐵王旗一路今改爲定南所副總兵范

邦雄共開過水田二萬三千六百一十畝鴨池

一路今改爲鎮西衛副總兵楊正芳共開過水

田二萬五千畝樂平一路今改爲柔遠所遊擊

金良田其開過水田六千五百畝龍場一路今
改爲敷勇衛總兵官王國禎其開過水田一萬
五千畝六廣一路今改爲濯靈所叅將方國安
其開過水田一萬畝狴狼一路今改爲息烽所
都司僉書袁桂芳其開過水田八千畝會省要
隘平伐定廣等處共開過水田二萬九千三百
九十畝以上通共一十一萬七千五百畝就令
各將計兵授田每兵授以十畝每畝抵糧六斗
其隔營寫遠不便耕作者卽聽召順苗佃種照

前額減輸一斗兵民俱各樂從內尚有未能盡
開與山坡高地一望荒蕪俱責成隨便耕墾槩
未起科計沿河兵一萬人業已足半年之食自
今設立世官分地信守則烟火漸聚墾闢漸廣
其勢自可長久業已具有列城扼險酌議世守
一疏奉有

明旨除另疏查覆外再照新開之田雖係水外之土
然當時屯制犬牙相錯亦有插入在內者無論
十年不耕卽承平時實已私賣或被占去今日

墾熟復來妄爭不知養兵贍軍守禦兵卽是軍何所區別若聽其阻撓則姦猾紛起相應嚴禁一曰舊屯查

祖制一軍授田十八畝歲輸屯糧四石五斗歲用銀三錢五分通省一十八衛通共祖軍三萬零六百八十七名查志書額載屯田四十九萬九千五百三十一畝迤西四衛如永寧赤水近已稍稍清理畢節烏撒二衛方在招集生齒甚稀姑候另報外其新添平越清平興隆都勻原未殘破

尺籍具在自龍里貴前一衛以至威清平堪普
定普安等衛悉俱殘毀查得龍里衛原額旗軍
一千二百一十二名今新招復一百六十四名
貴州衛原額旗軍二千九百一十一名今招復
一千零九十五名前衛原額旗軍二千四百三
十九名今招復九百八十四名威清衛原額旗
軍一千八百一十五名今招復六百一十八名
平堪衛原額旗軍二千一百一十六名今招復
四百一十二名普定衛原額旗軍二千四百三

十九名今招復一千一百七十八名安莊衛原額旗軍一千六百五十六名今招復三百零一名安南衛原額旗軍一千二百零一名今招復九百五十一名普安衛原額旗軍九百一十三名今招復五百五十六名夫軍有殺絕逃徙而屯固自在臣切責有司清查如龍里衛開墾出熟田一萬四千三百六十八畝又清出土官何中蔚賊田一萬五千六百零四畝零九釐五毫八絲貴州衛墾熟一萬九千八百一十九畝前

衛墾熟一萬零三百七十七畝一分三釐五毫
威清衛墾熟七千三百二十三畝三分平垣衛
墾熟一萬三千九百一十九畝普定衛墾熟一
萬零三十畝安莊衛墾熟一萬八千一百八十
七畝二分七釐三毫安南衛墾熟一萬五千五
百零四畝二分五釐普安衛墾熟四千二百六
十七畝五分又安籠安南平夷樂民四所招復
屯軍七百四十三名墾熟田五千九百畝至於
一望荒蕪爲數委多自應設法招徠漸次耕墾

資生有藉何人非兵惟是各衛所官實頑梗法
必須從屯政上課以殿最如印屯操捕等官有
清出屯田五十分以上練出精壯軍五百名足
資戢守者卽與提陞守備倍者又加一級其漫
不遵奉肆行違拗者輕則革任革俸重則徑題
革襲庶可警其玩而醒其迷也再照節奉部文
爲酌盈濟虛寬天下加派之半益屯損餉補節
中供億之繁以定中外以計萬世治安事一切
屯田欲照民糧起科查黔省祇有屯糧而民田

之糧較輕數倍此但當恢復

舊制必不能從新例者也一日民科查通省惟科田之糧最輕既無冊籍可稽亦無坵段畝數可考豪有力者或開荒或屯軍私買據爲己業重報升合以掩耳目故通省有田不輸賦民不當差之語卽如已故兩廣督臣王尊德戶內所上倉糧祇有五合此其大都也夫食土而不思輸賦有急而卽爲乞隣偶爾權宜終非久計獨不念經歲攻圍食子爰骸之慘何不乘此閒暇量輸

十一助飭武備匪惟分誼當然抑亦自爲身家計也臣據總兵官王國禎揭報安莊鄉官伍經文創義輪公已據安順府知府楊先芳同推官曹代之清丈增出科田五萬八千零八十九畝零內威清衛一千四百九十三畝平堪衛四千六百八十四畝七分三釐普定衛四萬二千八百九十六畝八分四釐八毫二絲安莊衛九千零一十四畝七分使鄉紳皆知伍經文有司皆如楊先芳等漸漸清理何事不濟臣與監司各

官酌議凡全未輸課者查出每畝徵糧一斗近
則輸倉遠則折銀五分似亦輕省易於出辦此
項專用贍兵不許別支亦可少得些須之助再
照黔省有司陋規每遇無主之田輒斷價充餉
士民以爲自官賣得絕不供輸而究竟所謂充
餉者亦從無報解臣入黔卽通行禁止而積習
相沿多有梗法相應申飭著爲厲禁以上三項
臣俱行道鎮分別給發繇票有繇者卽係實業
無繇者卽係欺隱一切清查稽覈業已分任責

成惟是大亂之後事難襲陋玩弛之極懲勸宜
明若諸有司如安順府知府楊先芳推官曹代
之實心任事清白自持業已查出賊絕併科田
舊額新增共十萬一千九百畝有零可稱循吏
之最相應先行紀錄楊先芳遇道缺優遷曹代
之候行取考選者也又查得涪潭縣知縣倪斯
荒徇私自專閔不畏法該縣賊首王倫所遺賊
田頗多祇報二百三十五畝及臣行令追租贍
兵堅執不肯必欲仍依陋規斷價官賣似此真

頑何以行法且該縣士民屢屢公訐所當照浮
躁例重加降處者也等因崇禎五年三月二十
三日奉

聖旨該部酌議具覆欽此欽遵抄出到部送司案呈
到部該臣等看得黔中等縣屢被爲難况兵火
十年軍民星散不知費

朝廷幾許金錢隣省幾番輸協粗成撫局急議招徠
甫集鴻哀尤防狼野則兵似未可盡撤也當於
撫民之中早裕贍兵之計其善後非容草草者

今該省督按倡率道府諸臣清理開墾招集布
置種種苦心不盡堪補西南半壁之天據所清
田畝分爲四項其水外新開五六百里之內者
爲賊田清出軍民被賊殺盡或逃出所拋田地
今係荒蕪無主者爲絕田此二項田應以之贍
新兵一爲屯田則祖給軍田應查原額清欺隱
者也一爲科田則前此士民墾出私田未經起
科今當減額起科者也夫大亂之後草昧重闢
臣等爲之更始區畫安流離之衆積守禦之儲

漸養土著以代客兵免乞西江以脩屯政爲黔
久計信無善於此者應當一一議覆其一爲新
屯據所開三岔烏江及清丈洪邊施秉等處田
畝聽其另疏查奏外如開鐵王旗等路賊絕田
共一十一萬七千五百畝以給防河之兵每兵
授田十畝每畝抵糧六斗一萬之兵半年之餉
無煩他求一兵給田十畝雖云見少而從此漸
復漸墾聚訓可期立官世守將來積旅成都此
其矯矢矣一爲舊屯龍里貴前等七衛四所田

地向遭殘毀今事後招軍墾熟雖未能頗還舊額而戀土有資易於充補人卽是軍便資捍衛額責印屯操捕等官實心清理以時訓練田不爲姦猾者隱占軍不以老弱者應數鎮道時加查驗督按卽以屯政課其殿最以爲黜陟如督臣所議清屯練軍欵例則官惜冠裳軍戀屯地干陬允有賴矣彼畢節烏撒等處之方在招集與平清興都等處之原未殘破者均可一體飭行也一爲 科查得黔初歸附尚未設流初立

軍屯額糧頗重嗣後漸立郡縣民籍開占二百
年來多有墾而未科區而未報者其賦較屯田
倍輕故督按前疏有民糧比屯糧反輕數倍之
說也今當覈底清查每畝徵糧一斗專貯贍兵
斗粟未爲厲民而積少亦可補餉且養兵以衛
民不猶愈遇賊拋去而逃散乎至於無主之田
或被賊殺盡應給新兵或逃散來歸酌查斷給
豈可任墨吏姦胥借口克蝕而斷賣潤橐切宜
嚴示榜禁者也編給絲號照例以十年造冊清

查則欺隱者無所施其術矣以上三款清地方
原有之田土而非厲民清軍民荒絕之科糧而
堪補餉生聚日廣訓練有加設誠行之法嚴令
簡久之不惟可以省遠隣之協濟亦可壯本地
之干城如督臣之密籌遠畧真足覘忠勤之一
班矣又疏稱安順府今陞任知府楊先芳推官
曹代之實心任事清白自持清出賊絕科田共
十萬一千九百畝可稱循吏之最又湄潭縣知
縣倪斯荒徇私自專閔不畏法此三臣者應聽

吏部分別紀錄議處者也至若伍經文之創義
翰公應令該督按給扁旌異若夫阻撓之人如
係軍民聽督按懲處如係紳士不妨勸諭如或
不悛難免指叅再照黔當痛定機勢難拘因時
制宜隨方合變又在地方官博咨利害詳計久
遠課郡縣而力行之持大綱而捐苛細一以輯
定人心爲主非臣部所能遙度也旣經奉

旨酌覆相應覆

請恭候

命下臣部咨行該省督按遵奉施行

崇禎六年正月二十日具

題二月初六日奉

聖旨該省清理田賦及各官紀錄議處旌異等俱依
議內絕田贍兵何以待流民復業屯地拋荒何法
令舊軍歸伍還行該督按酌議奏來該部知道欽
此

再題公用銀兩始末請早覆結疏

題爲搜括公用節省銀兩歸庫積貯以備緩急并
請覆覈永爲定制事案照崇禎四年十一月初
七日該臣部題前事初十日奉

聖旨這該部節省銀兩以前發過助餉等項知道了
其新發三千兩依議收貯老庫以備緩急之需永
着爲例至用過公費向未經巡視其中寧免冒濫
着移會總理逐一查覈方准開銷併每歲應否以
五千兩爲額通着查明具奏欽此隨該臣等備將

任內自崇禎元年八月起至四年十月止各鈔
關及崇文門解廊櫃扣省公用銀兩申解印信
文卷并收支循環原簿各開細冊咨送總理移
會巡視衙門以憑會查去後續因總理內臣張
彝憲具題調取各鈔關紅單號簿以圖徹底磨
算往返數月及解到單簿充棟又經總理查覈
數月方得完報以致耽延又閱一年是以廊櫃
查覈之

旨尚未題覆但調查單簿者所以覈在外各權司稅

額之完欠至會覈廊櫃銀兩係查臣部歲支公
用有無冒濫於單簿事似無干涉目今歲序將
更而

欽件尚稽科號催覆臣心悚惕未寧自去歲十一月
具題前疏後至今年十月止又經一年矣廊櫃
續收解支放過各鈔關崇文門扣省公費銀兩
數目俱經總理巡視於逐季解到之日先赴掛
號臣部方行劄收凡遇支給必據各司說堂臣
等再三厘節方批准支放填入循環隨逐月登

記清冊浴會總理查驗毫不敢濫筭自去年十一月起至今年十月止連閏共十三個月收過廊櫃扣省公費等銀連舊管新收共銀一萬二千五百三十七兩一分三毫四絲五忽五微零於內三次共解過老庫銀五千兩共支過工食刊刻板片紙墨修理襍項等銀七千一百五十八兩八錢九厘八毫六絲內有給發援察行糧二百兩在焉實在廊櫃銀三百七十八兩二錢四毫八絲零已經造冊補送總理巡視以便會

查早覆此又具題後續收續放之數也再照臣
部公費工食之始漫莫能考惟據部堂壁上木
牌開載係萬曆六年間本部尚書張學顏題爲
恪遵

明旨查正公用銀兩事內將題奉

欽依應存應革公用款項開列木牌其應存款項本
部尚書侍郎浙江等十三司司照二廳下糧廳
本科承發科缺科官吏每年筆墨炭價紙張及
二至陪祭上

陵習儀等禮各貨

朝房擺飯上任案衣門神土地祠香燭九門會佑攢
造

御覽會計漕運印刷議單刊刻榜文坐放月糧勘合
印刷通關抄報看守內外

朝房堂司廨署牆垣修理堂司書手皂隸工食等項
及禮部鑄印銅炭筆墨戶科史職紙價以上應
准動支其應革者如尚書侍郎明轎油衣牙牌
總印綬藤棍公宴看卓下程在外陞入京者寺

內

朝房擺飯陞轉文軸及堂司廳紅白柬紙等俱係私費相應裁革等因奉

神宗皇帝聖旨這公費錢糧既查覈明白應存應革的

俱依擬行欽此此臣部從前相沿公費工食之繇也

計其時疆圉寧謐兵餉未艱臣部侍郎員缺常

懸不補官少役稀爲費尚鮮歲支尚不甚煩自

神廟末年奴叛以來增兵措餉日不暇給張官置吏鑄

印開局部堂添設新舊二餉司及查覈兵馬錢

糧戶兵二科其他因事設官各有所費蓋既增
公署必增吏書皂役而工皂之不能不倍於往
昔者勢也又今歲霪雨衙門強半傾圯必資修
葺及每歲逐月刊刻十三省郡縣會計冊單清
單限單奏稿榜文板片紙墨工價飯食皆屬創
增則襍項支費之數其不能不倍於往昔者又
勢也兼以堂司署役既添則支費不免漸浮自
臣履任以來五年之中力經裁汰每月所支猶
必五六百兩而後足亦今昔時勢之變先後繁簡

之故有難於盡同者臣正惟恐後來愈增不止故極力樽積定爲歲解五千兩收入老庫以備緩急一以禁後來妄費一以杜工食告增區區削針培壤之微忱諒蒙

聖鑒故臣疏末原云統祈

勅下總理內臣逐一查覈方准開銷如有冒濫并行追究是臣本意正欲借

勅會查以表此銖積寸累之苦衷也通計臣任五年之內除支放公費工食銀二萬八千八百三十

入兩七錢零外前後共發解過太倉邊鎮共動
庫櫃銀三萬一千四百餘兩各有成案一經磨
出覈底自見臣可無容贅矣然奏發庫櫃銀兩
助邊亦不自臣始也查天啓五年前任尚書李
起元發過年例四千兩天啓六年又發過年例
五千兩未經具題天啓七年前任尚書郭允厚
發過年例四千兩崇禎元年發過新餉三千兩
題奉

欽依在案則是庫櫃扣省從前原不盡充公費臣抵

任後奏發克餉兩經具題亦不過遵循舊例倍
加謹凜已耳今臣已令貴州司將任內前後各
關門申解廊櫃文卷並每年逐月支放解發邊
餉及公費工食數目脩移總理巡視聽其遵

旨會查就中支銷有無冒濫每歲應否以五千兩爲
額原與各關單簿事體無涉是在總理巡視虛
公確酌或將廊櫃應用之數再爲裁節若干徑
解太倉以濟軍興早爲覆結請自

聖裁庶臣部支解畫一太倉積少成多而臣亦可稍

道於罪戾矣

崇禎五年十二月初二日具

題本月初五日奉

聖旨知道了着總理巡視各官查議具奏欽此